



書經繫傳旁通

八

十
三

服部文庫
117
151
8



書系氏傳旁通卷之四下

○旅獒

九夷八蠻多之稱也。職方言四夷八蠻。爾雅言九夷八蠻。但言其非一而已。

周禮注云。東方曰夷。南方曰蠻。四八。周之所服國數也。爾雅注疏云。東夷有九種。一曰玄菟。二曰樂浪。三曰高驪。四曰蒲飾。五曰島夷。六曰索豕。七曰東屠。八曰倭人。九曰天鄙。八蠻者。李巡云。一曰天竺。二曰咳首。三曰焦僂。四曰跋踵。五曰穿胃。六曰儋耳。七曰狗軹。八曰旁春。

武王克商之後威德廣被九州之外蠻夷戎狄莫不梯山航海而至。

按汲冢周書王會篇所載蠻夷戎狄所獻有曰稷慎文璧曰獾人前兒曰良夷在子曰揚州禺魚曰發人鹿人曰俞人雖馬曰青丘狐九尾曰周頭抵輝曰黑齒白鹿白馬曰白民黃乘曰東越海蜃曰甌人蟬蛇曰於越納曰姊妹珍曰且甌文蜃曰共人玄貝曰海陽大蟹曰自深桂曰會稽鞞曰義渠茲白曰央林尊耳曰唐戎閭曰渠叟鼯犬曰樓煩星施曰卜盧以牛曰區陽鼈封曰規矩麟曰西中

鳳鳥曰氏羌鸞鳥曰巴人比翼鳥曰方煬皇鳥曰蜀人文翰曰方人孔鳥曰卜人丹砂曰夷閼木曰康民桴苾曰州靡蕢蕢曰都郭生生欺羽曰竒幹善芳曰高夷噉羊曰獨鹿球球距虛曰孤竹距虛曰不令支玄獬曰不屠何青熊曰東胡黃熊曰山戎戎菽曰般吾白虎曰屠州黑豹曰禺氏黼黻曰大夏茲白牛曰犬戎古皇之乘曰楚數每牛曰匈奴狡曰權扶玉自曰白州比閭曰禽人管曰路人太竹曰長沙鼈曰魚復鼓鍾鍾牛曰蠻揚之翟曰倉吾翡翠正義所謂王會備焉者此也。

犬高四尺曰獒

据爾雅

公羊傳曰晉靈公欲殺趙盾盾踏階而走

見宣公六年踏丑略反何休注云踏猶超遽不暇以次

太保召公奭也史記云與周同姓姬氏

史記註譙周云周之支族食邑於召索隱云召者畿內采地或者謂文王取岐周故墟召地分爵二公故詩有周召二南言皆在岐山之陽故言南也

後武王封之北燕以元子就封而次子留周室代為召公至宣王時邵康公虎其後也謹德蓋一篇之綱領

新安陳氏云一篇皆自明王慎德一句推廣之曰昭德之致曰惟德其物曰德盛不狎侮曰玩人喪德曰終累大德德之一辭諄諄焉惟慎德所以自能致貢物惟所貢無異物所以見其慎德若奇玩之物非所當獻亦非所當受一受之則荒怠之心生而慎德之意失矣

其所貢獻惟服食器用而已無異物也

正義云。玄纁締紵。供服也。橘袖菁茅。供食也。羽毛齒革。瑤琨篠簜。供器用也。

如分陳以肅慎氏之矢

魯語云。仲尼在陳。有隼集于陳侯之庭而死。楛矢貫之。石砮其長尺有咫。陳惠公使人以隼如仲尼之館。問之。仲尼曰。隼之來也遠矣。此肅慎氏之矢也。昔武王克商。通道于九夷百蠻。使各以其方物來貢。使無忘職業。於是肅慎氏貢楛矢石砮。其長尺有咫。先王欲昭其令德之致遠也。以示後人。使求監焉。故銘其楛曰。肅慎氏之貢矢。以分太姬配。

虞胡公而封諸陳。古者分同姓以珍玉。展親也。分異姓以遠方之職貢。使無忘服也。故分陳以肅慎氏之貢。君若使。故府其可得也。使求之。得之。金櫝如之。

分魯以夏后氏之璜之類

左定四年。衛子魚曰。昔武王克商。成王定之。選建明德。以藩屏周。故周公相王室。以尹天下。於周為睦。分魯以大路大旂。夏后氏之璜。封父之繁弱。殷氏六族。分康叔以大路少帛。靖茂旃旌。大呂。殷氏七族。分唐叔以大路密須之鼓。闕鞞也。甲名。沽洗。懷。

姓九宗。職官五正。

不役於耳目之所好。

不為聲色所役也。心箴云。心為形役。乃獸乃禽。

周穆王得白狐白鹿而荒服因以不至。

作狐當

史記穆王將征犬戎祭公謀父諫王遂征之得四

白狼四白鹿以歸自是荒服者不至。

以武王之聖召公所以警戒之者如此。

董氏曰。聖人下以細行而不謹。大臣下以細過而

不諫。比古之所以君明臣良而後世鮮麗也。漢文

帝無太保之訓而却千里馬其賢矣哉。

○金滕

藏於金滕之匱。

王曰休曰。滕緘也。以金緘封。若今鎖。然鄭氏曰。凡

藏祕書皆然。非始周公。

築土曰壇。除地曰墀。

築土封土也。除地平地也。鄭玄云。時為壇墀於豐

壇墀之廡。猶存焉。

詩言圭璧既卒。

雲漢之辭。既卒。既盡用也。

周禮裸圭以祀先王先公。

冬官玉人云。裸圭尺有二寸有瓚。以祀廟。瓚如盤。其柄為圭也。林氏云。植璧於壇。秉圭於手。愚案。裸圭有瓚。非所秉者。所秉於手者。乃桓圭。信圭。躬圭耳。當如雲漢。總為禮神之玉。若為所秉於手者。則非裸圭也。故孔註以為周公秉桓圭。以為贄。蔡氏雖以為裸圭。而遂不容解秉字。要之周公當時亦無酌酒降神之事。當依古註為是。

若爾三王是有元子之責于天。蓋武王為天元子。三王當任其保護之責于天。

不可令其死也。于天之下。疑有關文。舊說謂天責取武王者非是。

新安陳氏曰。蔡氏謂任保護之責于天。未必然。惟不用師說。所以疑于天之下。有缺文。朱子語錄云。此一段先儒都解錯了。只有晁以道說得好。他解不至子之責。如史傳中責其侍子之責。蓋云上帝責三王之侍子。侍子指武王也。上帝責其來服事左右。故周公乞代其死言。三王若有侍子之責于天。則不如以我代之。我多材多藝。能事上帝。武王不若。且多材多藝。不能事鬼神。不如且留他在世上。定

你之子孫與四方之民文意如此

周公忠誠切至欲代其死以輸危急

林氏曰且多材藝元孫之死不若且之死元孫能

畏服四方則且之生不若元孫之生

習重也謂三龜之兆一同開筮見卜兆

之書乃并是吉

蔡氏及古註皆不明指是字為何物所并者何兆

愚竊謂以三龜卜之見兩兆皆吉故云一習吉及

啓筮見書乃云并此兆亦吉也

體兆之體也

薛氏曰體與詩爾卜爾筮體無咎言之體同周禮

占人云凡卜君占體大夫占色史占墨卜人占拊

然證以詩之語則卜看兆體亦可通上下言之

翼曰公歸之明白也瘳愈也

林氏曰請代武王之死者周公之本心也王瘳而

公不死者天也非人之所能為也

孺子成王也

案稽古錄武王克商七年而崩子成王誦立成王

年十三周公為冢宰攝行天子事據此則武王克

商二年病時成王僅八歲故不知卜事至此十三

歲而即位聞流言周公居東二年則成王已十五歲所謂五尺童子也故稱孺子冲子自成王即位至周公復辟時凡七年而成王二十歲所謂六尺之孤也

流言無根之言如水之流自彼而至此也

詩疏云流謂水流造作虛言使人傳之如水之流然

辟讀為避鄭氏詩傳言周公以管蔡流言辟居東都是也

見七月詩序下詩疏云居東者出颶東國待罪以需王之察已是說避居之意也周公避居東都史傳更無其事古者避辟反亦譬僻皆作辟字而借聲為義鄭讀辟為避故為此說○朱子與蔡仲默書云弗辟之說只從鄭氏為是向董叔重得書亦辨此一條一時信筆答之謂當從古註說後來思之不然時三叔方流言於國周公虺兄弟骨肉之間豈應以片言半語便遽然興師以誅之聖人氣象大不如此又成王方疑周公周公固不應不請而自誅之若請於王王亦未必見從則當時事

勢亦未必然。雖曰聖人之心公平正大。區區嫌疑似不必避。但舜避堯之子於南河之南。禹避舜之子於陽城。自是合如此。若居堯之宮。逼堯之子。即為篡矣。又謂成王疑周公。故周公居東。不幸成王終不悟。不知周公如何。則愚謂周公亦惟盡其忠誠而已。

鷓鴣惡鳥也。以其破巢取卵。比武庚之管蔡及王室也。

嚴氏詩緝云。鷓鴣惡聲之鷓鳥。喜破鳥巢而食其子。託為鳥之愛其巢者。呼鷓鴣而告之曰。汝先已

取我子食之矣。無更毀我巢也。喻為惡者既陷管蔡於罪矣。無更謀危王室也。恩愛勤勞。毓養此子。誠可傷憫。今既取之。其毒甚矣。况又毀我巢乎。程子曰。鷓鴣謂為惡者。子喻管蔡。室喻王室。呂氏曰。殷民流言中傷周公。謀危王室。故周公曰。管蔡親也。爾既以惡汚染。使陷於罪。是害我兄弟矣。又欲謀危王室。則不可也。

誦讓也。

讓責也。呂氏曰。王欲誦公而未敢。所謂未敢。則梅過之根本也。

新當作親

案陸氏釋文云新逆馬本作親逆

○大誥

三叔懼遂與武庚叛

東齊陳氏曰武王以公義封武庚而不重其怨以親愛用三叔而不料其反任人之過也使舍武庚而立微子三監雖欲叛而不從舍三叔而任他人武庚雖欲反而不敢宋子語錄云當初紂之暴虐天下之人胥怨無不欲誅之及武王既奉天下之心以誅紂於是天下之怨皆解而歸德於周矣然

商之遺民及與紂同事之臣一旦見故主遭人戮宗社為墟寧不動心茲固叛心之所由生也蓋始於苦紂之暴而欲其亡固人之心及紂既死則怨已解而人心復有所不忍亦事勢人情之必然者又况商之流風善政畢竟尚有在人心者及其頑民感商恩意之深此其所以叛也後來樂毅伐齊亦如此

紹介天明以定吉凶

韻會云紹介行也謂行人之副也書疏云天道玄遠龜是神靈能傳天意以示吉凶故疑則卜之以

繼天明道林氏曰。天之吉凶。示人甚明。然其道幽冥。無介紹以傳其意。惟卜之以龜。則天之明。曉可見。

反鄙邑我周邦

左傳宣十四年。宋華元曰。過我而不假道。鄙我也。鄙我亡也。杜預云。以我比其邊鄙。是與亡國同。

○微子之命

成王既殺武庚。封微子於宋。以奉湯祀。林氏曰。不曰宋公之命。而曰微子之命。蓋周以賓待之。非欲臣之也。吳氏曰。武王克殷。封武庚於殷。

壻封微子於宋。樂記曰。武王下車。投殷後於宋。是也。及武庚叛。成王殺之。始即微子已封之。宋國建之。為上公。以奉湯祀。蓋申命之書。非先未封至此始封也。史記世家言。周公既承王命。誅武庚。乃命微子。代殷後。奉先祀。作微子之命。以申之。其說為是。且武王猶封箕子於朝鮮。豈有捨微子不封。待成王而後封乎。新安陳氏曰。殺武庚。始命微子。奉湯祀者。蓋紂以嫡子立為天子。武庚紂子。實為大宗子。微子不過支子耳。武庚在。為殷後。奉湯祀者。武庚也。微子不得與也。武庚死。殷命黜。微子始得

代之為殷後歟。

微子帝乙之長子紂之庶兄也。

正義曰。呂氏春秋仲冬紀云。紂之母生微子啓與仲衍。尚為妾已而為妻。後生紂。紂父欲立啓為太子。太史掘法而爭之。曰。有妻之子不可立。妾之子故紂為後。鄭云。微子啓紂同母庶兄也。

宋亳在東故曰東夏。

自豐鎬言之則宋在東。宋國即隋之宋州。唐之睢陽郡。宋外應天府。今為歸德府。屬河南。即高辛氏闕伯所居商丘也。有微子墓。

服命上公服命也。

周禮典命云。上公九命。為伯。其國家宮室。車旗。衣服。禮儀。皆以九為節。司服云。公之服。自衮冕而下。如王之服。

○康誥

武王誥命為衛侯。

朱子語錄云。五峯胡氏於皇王大紀。考究得康誥。非周公成王時。乃武王時。蓋有朕其弟之語。若成王則康叔為叔父矣。又首尾只稱文考。成王周公必不稱文考。又有寡兄之語。亦是武王自稱。無

疑如今人稱弟兄之類又唐叔得禾傳記所載成王先封唐叔後封康叔決無姪先叔之理

武王分封之時年已九十

武王年九十三而終克商後七年而崩則克商時已八十六歲及至分封則近九十矣

衛康叔封布茲

徐廣曰茲者籍席之名諸侯病曰負茲索隱曰茲

一作莖公明草也言茲舉成器言豈立見潔草也

三月周公攝政七年之三月也始生魄十六日也蘇氏曰此洛誥之文當在周

公拜手稽首之上

新安陳氏曰初基定基址也鎬在西洛在東故曰東國洛見士朝見而趨事也民大和會人心本自和也播民和因人心之和而播敷宣暢其和也悅以使民民忘其勞公不忘民之勞而勤勞之所以得民心也以召誥考之周公以三月十二日乙卯至洛先觀召公營洛規模十四日丁巳行郊禮十五日戊午行社禮十六日己未初基作洛繼此五日內號召齊集計度區畫分配科派至二十一日甲子朝乃用書命庶殷諸侯丕作召誥所謂用書

命丕作即此所謂洪大誥治也如召誥傳中引春秋傳云云之類參以召誥日月昭合洛誥冠以此九句方有頭緒強附之此全不相應其為洛誥脫簡何可疑者諸家阿附牽強解之非矣

孟長也言為諸侯之長

吳氏曰詩序言衛不能修方伯連率之職康叔之為方伯無疑

明德慎罰一篇之綱領

林氏曰按蘇念生以溫為司寇立政司寇蘇公是也又定四年云武王之母弟八人康叔為司寇則

康叔以衛侯入繼蘇公為之故并以誥效刑暴之事告之

臬法也為準限之義

東齊陳氏曰臬門柵也有限準之義故以訓法猶謂法為律也愚案律即黃鍾十二律也毫釐不可差刑法亦然故稱法為律

呂氏曰外事衛國事也史記言康叔為周司寇職任內事故以衛國對言為外事云云異時成王或舉以任司寇之職而此未必然也

新安陳氏曰左傳定公四年有曰武王之母第八人周公為大宰康叔為司寇則康叔以諸侯入為王朝之卿明矣為司寇與即衛封兩不相妨往來乎朝廷邦國之間何往不可呂氏內事外事之說極當蔡氏何必疑之而乃添出異時成王或舉以任司寇之職一句適以助後世成王封康叔之說何也權用殷罰有倫者正是初得天下初分封時事若是後來何必師用殷罰為哉味此語愈見得此為武王之書也

要囚獄辭之要者也

東齊陳氏曰要者結罪之辭要囚謂結定其囚之罪也蔽要囚謂斷其所結定之囚猶今世引斷也今世大辟囚已結罪後猶有審覆經年者

顛越人

疏云謂不死而傷

夏法也

新安陳氏曰蔡訓夏為法未見所本愚案釋詁以典彝法則律夏皆訓常郭註云皆謂常法耳疏引不率大夏蔡氏蓋據此也

○酒誥

妹邦即詩所謂沫鄉。

孔氏曰妹地紂所都朝歌以北是薛氏曰妹古沫字水名因水名地愚按古文水名多從女如媯水姜水是也毛詩傳云沫衛邑也。

穆敬也詩曰穆穆文王是也或曰文王世次為穆亦通。

新安陳氏曰按照穆之穆與左傳合不易之論以穆考為穆穆之穆則詩稱武王曰率見昭考此昭字又如何訓耶穆穆之證非也。

天始令民作酒。

疏云世本云儀狄造酒又云杜康造酒本人以意為之今言天降命蓋人為亦天之所使也。

酒之禍人也而以為天降威者禍亂之成是亦天耳。

新安陳氏曰天降命與天降威當對觀設酒之初意本為祭祀乃天之降命也酒之流生禍亦天之降威也酒一而已用以祀者此酒也喪德喪邦者亦此酒也天理人欲同行異情人之於酒知其祭祀而本於降命之天又能於燕飲而凜然知有降威之天則天理行而人欲窒方無酒禍矣史氏漸

曰吾切喜衛人何其服酒誥之訓世守於無窮也始也商俗淫洩武王以酒誥戒之逮幽王之世上下沈湎衛武公作賓之初筵以見衛人非特一時聞訓不敢自越於禁防又能以其所以為禁防者傳為子孫法焉

肇敏

蔡初王氏曰肇訓敏未可曉愚案釋言云肇敏也郭云肇牽車牛蔡氏正据此而蔡初妄譏甚矣學不可不博

汝當用力戒謹殷之賢臣與鄰國之侯

甸男衛使之不酒于酒

林氏曰康叔為諸侯長故劫茲及侯甸男衛

太史掌六典八法八則內史掌八柄之法

太史內史在周官為宗伯屬而六典八法八則則冢宰所建以治百官而太史又建六典以為王逆邦國之治掌法以逆官府之治掌則以逆都鄙之治太宰既以八柄詔土內史又居中貳之以詔王治六典治典教典禮典政典刑典事典也八法官屬官職官聯官常官成官法官刑官計也八則祭

祀法則廢置。祿位賦貢。禮俗刑賞。田役也。八柄曰爵。曰祿。曰予。曰置。曰生。曰奪。曰廢。曰誅也。薛氏曰。二史掌邦法。在王朝則貳冢宰。在侯國則居賓友之地。陳氏傅良曰。諸侯有太史。無內史。內史惟天子有之。內史是商之故臣。康叔所當親之為友者也。愚案此章冠之以汝劓。愆殷獻臣。當如陳氏說。位三卿者。

大國三卿也。

圻父政官司馬也。主封圻。

圻詩作祈。毛云。祈父司馬也。職掌封圻之兵甲。釋

文云。封圻當作畿。古作祈。圻畿同。太司馬云。制畿封國以正邦國。

農父教官司徒也。主農。

大司徒云。以土會之法。辨五地之物生。以土宜之法。辨十有二土之名物。以任土事。辨十有二壤之物。而知其種。以教稼穡樹藝。以土均之法。辨五物九等。制天下之地。征乃經土地。而井牧其田野。凡此皆農事。既富而後教。先王之政也。

宏父事官司空也。主廊地居民。

周官云。司空掌邦土。居四民。時地利。正義云。諸侯

三卿以上有司馬司徒故知宏父是司空宏父也
言大父者以營造為廣大國家之父
羣飲蓋亦當時之法其詳不可得而聞
矣。

史記註云漢律三人以上無故羣飲罰金故賜酺
得會聚飲食酒誥羣飲之執其類此歟

○梓材

大家孔氏曰卿大夫及都家也

正義云卿大夫在朝者都家亦卿大夫所得邑也
又公邑而大夫所治亦是也愚案定四年云分康

叔殷民七族陶氏施氏繁氏錡氏樊氏饑氏終
葵氏即衛之大家也

律所謂知情藏匿貨給

三者皆因罪人所歷過或知情或藏匿或貨給之
貨當作資以貨資之也

漢律所謂痕也

痕說文云毆傷也諸氏切

此章文多未詳

新安胡氏曰祭傳僅訓字而云多未詳信當缺之
愚以意解之云汝若常言及曰我固有官師為師

三卿及正官之長及衆大夫然必自曰我不可厲
屠殺人亦以為入上者當率先恭敬勞來故在下
者無往而不恭敬勞來矣惟其有欽恤之心勞來
之意其用刑也故於往日為姦為究或殺人或歷
人皆宥之故亦於見其君事而有毀傷人者亦宥
之往日紂在時也見厥君事亦紂事也蓋商紂之
時其民多有為惡者康叔於此不當追咎於既往
而與之更新可也

康叔所封亦受畿內之民當時亦謂之
監

受紂也非授受之受東齊陳氏曰康叔孟侯故稱
之為監

敷畱廣去草棘也

敷廣也爾雅云田一歲曰畱郭璞云江東呼初耕
地反草為畱

畎通水渠也

周禮匠人為溝洫廣尺深尺田畎

塗既土泥飾也

說文云墜飾塗也

茨蓋也

穀梁傳註云茨謂茅蓋屋也。

梓良材。

梓木名。

臙米色之名。

正義云臙是米色之名有青色者有米色者鄭玄引山海經云青丘之山多有青臙此經知是米者與丹連文故也。

樸斲以喻制度。

陳東齊云具粗曰樸致巧曰斲。

肆今也。

新安陳氏曰蔡氏訓肆為今未安愚案釋詁云肆故今也郭云肆既為故又為今今亦為故故亦為今蔡氏正據此陳氏未考耳。

監視也。此人臣祈君求命之辭也。案梓材有自古王若茲監罔攸辟之語而編書誤以監為句讀而爛簡適有已若茲監之語以為意類合為一篇而不知其句讀之本不同文義之本不類也。

新安陳氏曰已若茲監與自古王若茲監相似而實不同上文之監平聲三監之監此之監去聲監

觀之監已乎。君其監觀于茲。臣所祈於君。惟曰欲自今至于萬年。當為天下王。王之子子孫孫。求保民而已。其人臣祈君求命。忠愛無窮之心歟。

書蔡氏傳旁通卷之四下

書蔡氏傳旁通卷之五

後學 東匯澤 陳 師凱 譔
後學 豫章 朱 萬初 校正

○召誥

武王克商遷九鼎于洛邑。

見左傳桓二年。又宣三年云。王孫滿對楚子曰。昔夏之方有德也。遠方圖物。貢金九牧。鑄鼎象物。以承天休。桀有昏德。鼎遷于商。載祀六百。商紂暴虐。鼎遷于周。成王定鼎于郊。廓卜世三十。卜年七百。天所命也。

尚書卷之二十一
史記載武王言我南望三塗史作塗北望
嶽鄙顧詹有河粵詹洛伊母遠天室營
周居于洛邑而後去

史記索隱云杜預曰三塗山名太行轘轅峭崿也
在陸渾縣南嶽蓋河北太行山鄙都鄙謂近嶽之
邑愚謂顧詹有河謂回視河水在後也粵詹維伊
母遠天室史記正義謂粵者審慎之辭言審慎詹
維伊二水之陽無遠離此為天室也愚謂粵與越
同及也及視維伊二水之傍若天室之所在宜為
王者之都毋捨此而遠去也天室猶天府也

既望十六日也乙未二十一日也

林氏曰漢志曰周公攝政七年二月乙亥朔庚寅
既望故二十一日為乙未

戊申二月五日也

漢志曰三月甲辰朔三日丙午愚案二月小盡故
三月得甲辰朔五日得戊申

規度其城郭宗廟郊社朝市之位

周禮匠人營國方九里旁三門國中九經九緯經
涂九軌左祖右社面朝後市市朝一夫王宮門阿
之制五雉宮隅之制七雉城隅之制九雉經涂九

軌環涂七軌野涂五軌旁三門則四面通十二門也國中城內也九經直路九條也九緯橫路九條也涂路也九軌言路之廣也軌車轍也乘車之轍六尺六寸兩旁加各七寸通八尺九軌之廣七十二尺也左祖宗廟在王宮之東也右社社纓壇在西也面朝者面猶鄉也布政之朝廷在王宮之前也後市市在後也市朝一夫市與朝各方百步也阿棟也高一丈長三丈謂之一雉王宮之門屋脊高五丈也隅者角上浮思也疏云浮思小樓也上刻畫雲氣虫獸宮隅之制七雉者王宮之四角高

七丈也城隅之制九雉者城角高九丈也環涂者遶城下路也七軌廣五丈六尺也野涂國外之路也五軌廣四丈也又案周書作雉云周公將致政乃作大邑成周于上中城方千七百二十丈郭十七里南繫于洛水北因于郊山以為天下濼乃設丘兆于南郊以祀上帝配后稷愚案以六尺為步等之則九里之城計方一千六百二十丈汲書云七百者古本字訛耳郊山即郊廓之郊史記正義云郊山名廓邑名括地志云故王城一名河南城本郊廓周公新築在洛州河南縣北九里苑內

也。郊祭天地也。故用一牛。社祭用太牢。禮也。

孔氏云。郊以后稷配。故一牛。疏云。記及公羊皆曰。養牲必養二帝牛。不吉。以為稷牛。呂氏曰。郊祭天。社祭地。愚案。上三說皆是也。古者無天地合祭之禮。所以郊用一牛者。一為上帝之牛。一為配帝后稷之牛。蔡傳謂祭天地。故用二牛。此說誠誤。社為土神。即祭地之禮。朱子言之詳矣。蔡氏不用何也。王制曰。天子社稷皆太牢。

春秋傳曰。士彌牟營成周。

見昭公十二年。即周敬王十年。

揣高低。勿溝洫。物土方。

度高曰揣。度深曰勿。物相也。相取土之方面也。

邦伯者。侯甸男服之邦伯也。

邦伯諸侯之長也。

王氏曰。成王欲宅洛邑者。以天事言。則

日東景朝當作夕多陽當作風日西景夕當作朝

多陰。日南景短多暑。日北景長多寒。

洛天地之中。風雨之所會。陰陽之所和。

也。
大司徒云。以土圭之法。測土深。正日景。以求地中。日南則景短。多暑。日北則景長。多寒。日東則景夕。多風。日西則景朝。多陰。日至之景。尺有五寸。謂之地中。天地之所合也。四時之所交也。風雨之所會也。陰陽之所和也。然則百物阜安。乃建王國焉。制其畿方千里。而封樹之。鄭司農云。土圭之長。尺有五寸。以夏至之日。立八尺之表。其景適與土圭等。謂之地中。今潁川陽城地為然。馮氏子亮云。土中之說。蔡氏引王氏所論。而今本多訛。日東景夕。多

風。誤為景朝。多陽。日西景朝。多陰。誤為景夕。多陰。宜正之。又案王氏據周禮。而鄭註不明。蓋地官司徒。測土深。正日景。所以求地之中也。所謂日南景短。日北景長。日東景夕。日西景朝者。是指其立表之處而言。其不中也。日南云者。是立表於晝日之南也。表立於此。則其影必短於圭。而其地多暑。是偏於南矣。日北者。是立表於晝日之北也。表立於此。則其影必長於圭。而地多寒。是偏於北矣。表立於晝日之東。則日至夕。而表影方與圭齊。是又偏於東。而其地多風矣。表立於晝日之西。則日方朝

而表影已與圭齊是又偏於西而其地多陰矣凡此皆非地之中也而用此法者乃所以求中也案步占之說以為日與地相去一萬五千里為地之中土圭之法圭長一尺五寸以一寸準千里當晝漏方半置圭立表以測度之夏至之日立八尺之表其影適與土圭等定此為地中也又察寰宇記云河南府登封縣測景臺在縣東南二十五里高一丈周迴十六步周禮地中在此也縣北有陽城山。

王之初服若生子無不在於初生習日為

善則善矣自貽其哲命為政之道亦猶是也。

新安陳氏曰明哲之性與生俱生初生之時習於善則明可作哲習於惡則靡哲不愚哲則為天所命愚則天不命焉是自貽哲命如所謂自求多福此所謂無不在其初生時自貽哲命者王之初服亦猶是也此一節發明王乃初服之意蓋今日作邑而自服土中乃所謂初服是又中天下定四海之一初也天之命吉凶判於此王之能敬德祈求命與不能亦判於此召公所以欲王乘此一初之

機而疾敬德也。疾敬德則能用德。疾云者欲其乘此機而速勉之。

○洛誥

復如逆復之復。

逆復出周禮已見龍作納言下

復命于王。

葉氏曰如孟子有復于王之復

王莽居攝幾傾漢鼎皆儒者有以啓之。

古註云周公言我復還明君之政于子新安陳氏曰王莽廢漢孺子嬰為安定公執其手流涕曰昔

周公攝位終得復子明辟今予獨迫自皇天威命不得如意蓋因孔氏釋經之誤莽遂借此以文其姦也

洛師猶言京師也。

京大也師衆也

河朔黎水河北黎水交流之內也。

蘇氏曰黎水今黎陽也黎陽漢縣今大名路瀋州也地有黎陽津亦名白馬津

澗水東瀍水西王城也朝會之地瀍水東下都也。虺商民之地王城在澗瀍之

間下都在瀍水之外其地皆近洛水故兩云惟洛食也

史氏漸曰澗瀍之東西即洛之中也澗水之東即洛之偏也同名為洛而王城頑民之居不同非洛自為洛澗瀍自為澗瀍洛邑居天下之中伊洛澗澗實周流於其間天子南嚮則澗水在洛之右瀍水在洛之左周公於澗瀍之中龜兆告吉遂營王城以建王居定郊社宗廟是為郊廓之地今之河南是也又循之左越瀍水之東龜復告吉遂營下都名曰成周又曰東郊以居設民今之洛陽是也

二城相距十有八里

下逮胞翟之賤亦皆有孚顒若

祭統云夫祭者界輝輝運胞庖翟閣者惠下之道也輝者甲吏之賤者也胞者肉吏之賤者也翟者樂吏之賤者也閣者守門之賤者也易云觀盥而不薦有孚顒若程子云盥謂祭祀之始盥手酌鬱鬯於地球神之時薦謂獻腥獻熟之時居上者正其表儀如始盥之初勿使神意如既薦之後則天下之人莫不盡其孚誠顒然瞻仰之矣顒仰望也予惟謂之曰庶幾其有所事乎公但微

示其意以待成王自教詔之也。

新安陳氏曰周公言我今整齊其營洛之百官使從王于宗周我惟謂之曰王庶幾將適新邑而有事乎國之大事在祀與戎故古人於祭祀皆曰有事公但微示王將行祀事於洛之意於百官以待王之自教詔之也。

宗周之四輔漢二輔本諸此。

朱子云四輔猶四隣也漢二輔京兆馮翊扶風三郡也案王制曰設四輔及三公四輔左輔右弼前疑後丞也蔡不據此者以成周末嘗設四輔官時

公且任太師在三公列不聞為四輔故止引漢二輔為比周家非有二郡特以王城鎬京相為鄰輔如朱子四鄰之義可

公又言其自是宅中圖治。

此言曰其自時中又案召誥云且曰其作大邑其自時配皇天於祀于上下其自時中又周公固嘗舉與召公言之此又舉以答成王也。

秬黑黍也。一稔一十米。和氣所生。鬯鬱金香草也。

正義云以黑黍為酒。糞鬱金之草。築而和之。使芬

香調暢謂之秬鬯徐鉉云秬米穀也音孚爾雅曰秬黑黍秬一稔二米郭云秬亦黑黍但中米異耳漢和帝時任城生黑黍或三四實實二米得黍三斛八斗是也詳此則一稔二米名曰秬常罕得既名秬鬯則不必其皆一稔二米也

白中尊也

爾雅文也孫炎云尊彝為上罍為下白居中郭璞云白不大不小者爾雅疏云是在罍彝之間即周禮犧象壺着大山六尊是也罍者尊之大者也察禮圖云六彝為上受三斗六尊為中受五斗六尊

為下受一斛毛詩說金罍大下碩是也彝白罍三者皆為盛酒器也

酒清人渴而不敢飲也肉乾人飢而不敢食也

聘義文

享有體薦

見左傳宣十六年

敬之至者其禮如祭

新安陳氏曰寧如歸寧父母之寧曰明禋拜手稽首休享者述王命使之辭曰此明潔以敬祀之酒

今拜稽而致休美以享公焉敬之至者其禮如祭
傳曰享有體薦一證也記曰君子敬則用祭器又
一證也

宿與顧命二十宿之宿同

宿進爵也顧命則謂二進爵於神前此則周公言
我不敢自進此酒則用以祭文武也

戊辰十二月之戊辰日也

蔡氏於康誥篇首以二月哉生魄為周公攝政七
年之三月則此十二月亦在七年也康誥篇首乃
洛誥脫簡及召誥洛誥月日皆第七年中事今以

漢志考之云周公攝政七年三月乙亥朔召誥言
二月既望十六日庚寅也越六日乙未二十一日
也三月甲辰朔惟丙午臘三月初三也越三日戊
申初五日也越三日庚戌初七日也越五日甲寅
十一日也若翼日乙卯十二日也越三日丁巳十
四日也越翼日戊午十五日也此接康誥三月哉
生魄十六日巳未也又召誥越七日甲子二十一
日也洛誥予惟乙卯即召誥三月十二日也戊辰
王在新邑十二月三十日也唐孔氏謂此歲有閏
九月辛未朔小則十二月三十日戊辰晦也

烝祭之禮。

冬曰烝。

周尚赤故用騂。

騂赤色毛也。

宗廟禮大牢。

合用牛一羊一豕一。

此用特牛舉盛禮。

文武各一牛故為盛。

逸史佚也。

時太史名佚古字通作逸。

太室清廟中央室也。

明堂中央曰太廟太室樂記註云文王之廟為明堂制周頌云清廟祀文王也疏云天德清明文王能象天之清明故謂其廟為清廟然則清廟者洛邑文王廟名以其制如明堂故亦有中央太室此蔡氏所以訓太室為清廟中央室也。

周公自留洛之後凡七年而薨也。

周公位冢宰攝政已七年欲退休成王留之治洛又歷七年自武王喪後共十四年也兩經七年新安陳氏以為惟七年即攝政之七年者非是。

○多士

弗弔未詳。

大誥引不弔昊夫與此同。

旻夫秋天也。

爾雅云春為蒼天夏為昊天秋為旻夫冬為上天。

肆與康誥肆汝小子封同。

肆故也。

弋取也弋鳥之弋。

論語曰弋不射宿以生絲繫矢而射也。

栽者培之傾者覆之固其治而不固其

亂者天之道也。

仲虺之誥曰推亡固存與此固字同義蓋能自種其德者天因以加培之自傾其德者天因以覆滅之福善禍淫天之道也聖人豈容心哉惟天所命耳。

降猶今法降等四國之民罪皆應死我

大降爾命不忍誅戮。

如今云滅死一等也。

來自商奄。

孟子註奄東方之國史記註云奄於險反兗州曲

阜縣奄里即奄地東齊陳氏曰此奄與淮夷三監同助武庚以叛周公東征一舉而誅四國獨言來首奄者伐奄在後誅奄即來也四國殷管蔡霍也邑四井為邑之邑

四井二十二家也五畝之宅二畝半在田二畝半在邑所謂宅爾邑也

○無逸

劉裕奪農畝而取江左一再傳後子孫見其服用反笑曰田舍翁得此亦過矣南史宋高祖劉裕孫孝武帝駿壞高祖所居陰室

為玉燭殿牀頭有土障壁上掛葛燈籠麻繩拂表顛因盛稱高祖儉德上曰甲舍翁得此已為過矣祖甲高宗之子祖庚之弟漢孔氏以祖甲為太甲又經世書高宗祖庚祖甲世次歷年皆與書合又周公言自殷王中宗及高宗及祖甲及我周文王及云者因其先後次第而枚舉之辭也則祖甲之為祖甲而非太甲明矣

西山真氏曰祖甲為太甲明矣蘇氏以享國多寡為次得之新安陳氏曰祖甲為太甲較分明經世

書與三及字皆不足接以為辨太甲為商賢君萬萬不可磨何苦極力挽從來無入齒及之帝甲以排太甲乎。○愚案真氏陳氏皆不取蔡氏說今且平論之蘇氏謂以享國多寡為次則高宗五十九年之後便當到文王五十年何必逆取太甲以廁於其間此蘇氏之說非也陳氏謂經世書三及字皆不足接其意默取蘇說以破蔡傳然考之經文則祖甲享國下即云自時厥後立王生則逸又云亦罔或克壽既以祖甲為太甲則中宗高宗皆大甲後人安得言生則逸罔或壽耶既云不論世次

則不可言自時厥後矣以兩自時厥後詳之則蔡傳所考不可破而孔氏蘇氏真氏陳氏諸說皆非

是月朕也。

是月朕也。

春秋貢於霸王。

左傳昭十二年晉合諸侯於平丘子產爭承曰行理之命無月不至貢之無藝小國有闕所以得罪也。

唐有送使之制。

唐食貨志云。憲宗時分天下之賦為三。一曰上供。二曰送使。三曰留州。

○君奭

臣扈與湯時臣扈二十人而同名者也。

疑至臣扈湯時二臣名輯纂陳氏云湯至太戊百二十十年必二人而名同也。

在武丁時不言傳說豈傳說不配食於配天之王乎。其詳不得而聞矣。

息齋余氏曰不言傳說即下文不言尚父之意愚案周公以君奭為經歷之舊臣而留之故歷數商

周之老成是以武丁時不言傳說文武時不言太公傳說太公非若其盤毓叔之舊也。

陟分遐也。

如陟方乃死之陟。

通徹二極而無間。

貫通天地人之理也。

卷阿鳴于高岡者乃誅其實故周公云。

卷阿召公所作曰鳳凰鳴矣于彼高岡蓋衆人之所聞見喻大賢魁高顯之地召公既言之矣今乃

求去故周公云我則鳴鳥不聞也

震撼擊撞欲其鎮定

言所以勉人心之未服者

辛其燥濕欲其調劑

言所以勉人情之未和者

槃錯芬結欲其解紿

言所以勉人事之未靖者

黜闇汚濁欲其茹納

言所以勉人言之未順者

患失乾沒者

患失即論語所謂鄙夫乾沒出前漢張湯傳云始為小吏乾沒服戾曰射成敗也如淳曰豫居物以待之得利為乾失利為沒乾音干

召公親遭大變破斧缺斨之時

詩云既破我斧又缺我斨言周公東征誅戮兵器弊壞之時也

超然肥遯

肥遯遯卦上九爻辭也程子曰肥者充大寬裕之意遯者飄然遠逝無所係滯之為

○蔡仲之命

此篇次序當在洛誥之前。

蓋以事在周公攝政七年之中不在留洛七年之內也。

蘇氏曰郭貌也。

當時聲訛以貌為郭如韓為何陳為田之類。

管霍國名。

今河南鄭州管城縣古管國也。左傳閔二年晉滅霍。杜預云永安縣東北有霍太山。今山西平陽路霍山也。

周公留佐成王食邑於圻內。圻內諸侯。

孟仲二卿故周公用仲為卿。非魯之卿也。

知非魯國之卿者。以左傳定四年云蔡仲改行率德。周公舉之。以為已卿士。周公未嘗居魯。既曰已卿士。是圻內之卿士也。孟仲二卿猶言上下二卿。皆命於其君。周公以仲為已卿士。則是自命之卿也。

蔡左傳在汝淮之間。

杜預云武王封叔度於汝南上蔡。胡徙新蔡。昭侯徙九江下蔡。愚案汝南上蔡今汝寧府上蔡縣也。

新蔡舊亦為蔡州屬縣今廢下蔡宋為壽州倚縣今廢在安豐路界內

此章與伊尹申誥太甲之言相類而有深淺不同者太甲蔡仲之有間也

伊尹曰克敬曰有仁曰克誠此語深且詳矣此以惟德惟惠言之則所包者廣不如敬仁誠分別之切蔡氏所謂淺也蓋太甲敗度敗禮之餘仲則邁迹自身彼則以臣而告君此則以上而訓下故其深淺詳畧之不同如此

中者心之理而無過不及之差者也

中者本所以狀性之德今經言率自中是循而由之之義故直以心之理訓之若論其未發則在中之中無所偏倚是為天下之大本及其既發而時中然後見其無過無不及也所謂天下之達道也

多方

光武成功若建瓴然

建音蹇瓴音苓漢書云居高屋上建瓴水註云建瓴水也瓴盛水瓶也居高而翻瓶水言易也西漢之末王莽篡逆公孫述據成都隗囂據天水光武以漢宗室起兵南陽破莽兵海內豪傑響應皆殺

卷八
四十一
恭、牧字用漢年號。旬月徧天下。更始殺王莽。光武破隗囂。擊殺公孫述。天下復為漢者二百年。
成王即政之明年。商奄又叛。成王征滅之。

新安陳氏曰。洛誥戊辰。王在新邑。孔註。十二月戊辰晦。此七年之十二月。即成王即政之年也。多土作。於是年之三月。曰昔朕來自奄。是述東征時事。乃自武王誅紂伐奄後。第一番叛也。多方作於即政之明年五月。成王政序曰。成王遂踐奄。多方序曰。武王歸自奄。此書曰。成王來自奄。乃奄之第二

叛。王隳其城。遷其君。又因以告多方也。以去年十一月戊辰晦筭之。則次年正月朔己巳。五月朔非丁卯。則戊辰丁亥。非二十。即二十一日也。多土與多方之作。先後蓋一年有二月云。

奄不知所在。

解在多士。寰宇記在曲阜縣奄中。古奄國也。

衛孔悝之鼎銘。

見祭統。孔悝。衛莊公蒯聩時大夫也。鄭注云。周既去鎬京。猶名王城為宗周也。悝音恢。

時鎬已封秦。

史記大戎殺周幽王酈山下秦襄公以兵送平王
遷都維封襄公為諸侯賜以岐豐之地
克堪者能勝之謂也

新安陳氏曰克堪二字下得極有力非有仁以為
已任之弘兼死而後已之毅不能堪而用之也克
堪用之必有非力之力如真積力久之力而後可
神天之主

東齊陳氏曰可為神與天之主山川宗社之得其
安三光寒暑之得其序皆人君有以主之
龍言服

龍言實涉反漢書云羣臣震龍言龍中自服也

實介之介

相副相助者

周官多以胥以伯以正為名

加大胥小胥象胥宗伯官伯官正酒正之類胥有
才智者也伯與正皆長也

○立政

葛氏曰綴衣周禮司服之類

天官有司裘有內司服有縫人春官亦有司服
虎賁周禮之虎賁氏也

蔡氏謂執射御者曰虎賁。今案夏官虎賁氏掌先
後王而趨舍則守王闕在國則守王宮有大故則
守王門無執射御之事。又有旅賁氏掌執戈盾夾
王車而趨。

牧民之長曰常伯。任事之公卿曰常任。
守法之有司曰準人。

呂氏曰常伯等即三宅三代之書他無所見意者
公卿輔相之別名歟。官有別名如相曰阿衡保衡
三卿曰圻父農父宏父。此亦三代輔政大臣別名
耳。綴衣虎賁特於侍御僕從中錯舉二者以見其

餘耳。職重者有安危之寄。職親者有染習之移。其
繫天下之本一也。新安陳氏曰呂說得之。宅事常
任所職必廣。凡任事之大臣也。宅牧常伯主牧養
之大臣也。宅準準人主平法之大臣也。又案虞有
十二牧。夏周有九牧。皆在邦國。意必有大臣在朝
者以統之。如虞四岳統十二牧。周六卿倡九牧。立
政。所謂常伯宅牧必長牧養而在朝以統牧伯者
歟。

甸者井牧其地什伍其民也。

井牧者按小司徒云乃經土地而井牧其田野九

夫為井。四井為邑。四邑為丘。四丘為甸。四甸為縣。四縣為都。什伍其民者。大司徒云。五家為比。五比為閭。四閭為族。五族為黨。五黨為州。五州為鄉。又小司徒云。五人為伍。五伍為兩。四兩為卒。五卒為旅。五旅為師。五師為軍。又遂人云。五家為隣。五隣為里。四里為鄴。五鄴為鄙。五鄙為縣。五縣為遂。凡治野。夫間有遂。十夫有溝。百夫有洫。千夫有澮。萬夫有川。此井牧什伍之大綱也。

以是立民。長伯則體統立。而下有所寄。
新安陳氏曰。立民。長伯當時宅後。或有出而封為

長伯者。愚案康叔為司寇。是宅乃隼者。封於衛為孟侯。詩序言衛不能修。方伯連率之職。是二宅為長伯之證。

趣馬掌馬之官。

趣。七口反。周禮趣馬下士。阜一人。徒四人。

携僕携持僕御之人。

周官有太僕。下大夫。祭僕。中士。御僕。下士。隸僕。下士。大馭。中大夫。戎僕。中大夫。齊僕。下大夫。道僕。上士。田僕。上士。馭夫。中士。車僕。中士。

庶府若內府太府之屬也。

周官有玉府內府外府泉府天府。

大都之伯。小都之伯。

畿內之都。大都為公之采邑。小都為卿之采邑。

藝人者卜祝巫匠執技以事上者。

卜如太卜。卜師龜人。巫人。籒人。占夢。眠。祲。是也。祝。

如大祝。喪祝。甸祝。詛祝。是也。巫如司巫。男巫。女巫。

神士。是也。匠如攻木。攻金。攻皮。設色。刮摩。搏埴之

工。皆是也。王制云。凡執技以事上者。祝史。射御。醫

卜。及百工。

如庖人內饗膳夫。則是數尹之伯也。

傳意謂庖人為庖尹。內饗為饗尹。而膳夫則兼二者而為之伯也。蓋庖饗各治其事。而又統於膳夫也。然此二句以下文比之。必有脫字。

鐘師尹。鍾磬師。尹。磬。太師。司樂。則是數尹之伯也。

太師及司樂為鍾師磬師之伯。此二節特舉例以解尹伯。以是求之。尹伯固不止於此二者矣。

太史。奉諱。正惡。公。天下後世之是非。

王制云。太史典禮。執簡記。奉諱。惡。簡記。策書也。動則左史書之。言則右史書之。大事書于策。小事簡

牘所書善惡必以實錄所謂公天下後世之是非也諱先主名也惡忌日也先主死日及子卯不樂周官云小史詔王之忌諱

此諸侯之官也司徒主教司馬主政司空主土諸侯之官獨舉此者以其名位通於天子歟

愚案康誥言圻父農父宏父三卿亦與此同可見此為諸侯之官蓋大國三卿兼攝六事傳謂名通天子者大國三卿皆命於天子也

亳見史二十亳蒙為北亳穀熟為南亳偃

師為西亳

此據正義所引皇甫謐說也寰宇記考城縣有北亳城今睢州考城縣也蒙縣名今廢又云宋州穀熟縣亳城在縣西南三十五里宋州今歸德府也穀熟縣廢偃師縣屬河南府地志云河南偃師尸鄉殷湯所都臣瓚曰湯居亳今濟陰縣是也今亳有湯冢已氏有伊尹冢師古曰瓚說非也又如皇甫謐所云湯都在穀熟事並不經劉向云殷湯無葬處安得湯冢乎

地志載王官所治非一

案地志中國四夷皆有都尉治在蠻夷謂之中部
 都尉東部都尉南部都尉西部都尉北部都尉又
 有屬國都尉宜禾都尉騎都尉農都尉江關都尉
 匈奴都尉等數十處意與夷微盧烝三亳阪尹相
 似皆王官出治外地者

蘇國名左傳蘇忿生以温為司寇

地志云温已姓蘇忿生所封左傳語見成公十
 年温今孟州温縣也

書蔡氏傳旁通卷之五

